

Staðfesting konungs á skipulagsskrá fyrir styrktarsjóð Hjálmars 64 kaupmanns Jónssonar útgefin á venjulegan hátt ad mandatum af ráðgjafanum 10. júní fyrir Ísland 10. júní 1903.

Skipulagsskráin er þannig:

Skipulagsskrá

fyrir

styrktarsjóð Hjálmars kaupmanns Jónssonar.

1. gr.

Sjóður þessi, sem stofnaður er af Hjálmari kaupmanni Jónssyni með arfleðsluskrá, dagsettri 14. september 1893, og viðaukum við hana, dagsettum 19. marz 1895 og 16. maí 1900, skal ávallt heita »Styrktarsjóður Hjálmars kaupmanns Jónssonar«.

2. gr.

Yfirumsjón sjóðsins er falin landshöfðingjanum yfir Íslandi; stjórnendur sjóðsins eru biskupinn yfir Íslandi og tveir menn aðrir, er landshöfðingi tilnefnir æfilangt, og sje jafnan annar þeirra lögræðingur. Biskupinn er oddviti stjórnarnefndarinnar, og skal annar hinna tveggja vera skrifari stjórnarnefndarinnar. Stjórnendur fá enga þóknun fyrir starfa sinn.

3. gr.

Stofnfje sjóðsins var úthlutað á skiptafundi eptir hinn framliðna og nam í peningum 13457 kr. 60 a.; en samkvæmt viðauka við arfleðsluskrá hins framliðna, dagsettum 16. maí 1900 eiga hinir árlegu vextir að leggjast við höfuðstólinn, þangað til hann nemur 15000—fimmtán þúsund—krónum.

Höfuðstól sjóðsins má aldrei skerða og skal ávallt ávaxta hann samkvæmt því sem lög skipa fyrir um ávöxtun á ómyndugra fje. Verðbrjef sjóðsins geymir landshöfðingi og skulu þau bera nafn sjóðsins og áteiknun landshöfðingja um afhendingarbann.

4. gr.

Sjóðurinn er stofnaður til styrktar verðugum og fátækum ekkjum og börnum íslenzkra fiskimanna, er á sjó drukkna. Við íslenzka fiskimenn skilur skipulagsskrá þessi fiskimenn þá, sem að minnsta kosti 3 síðustu ár æfi sinnar hafa haft fastan bústað á Íslandi.

Styrksupphæðunum skal úthlutað fyrir eitt ár í senn og greiðast þær 1. júlí ár það, er um er að ræða. Enginn getur orðið styrksins aðnjótandi, þiggi hann sveitarstyrk eða hafi þegið og eigi endurgoldið, og eigi má heldur veita barni, sem er fullra 15 ára, neinn styrk af sjóðnum.

Fyrir ekkju skal hin árlega styrktarupphæð nema 50 kr. eða 100 kr. eptir álitum stjórnarnefndarinnar, og skal í því tilliti tekið fram, að hina stærri styrksupphæðina skal að jafnaði eingöngu veita ekkjum, sem fyrir heilsubrest eða elli eigi geta unnið fyrir sjer eða sem hafa fyrir mörgum börnum að sjá.

Fyrir börn skal hin árlega styrksupphæð vera 30 kr. eða 60 kr. eptir

64 10. júní álitum stjórnarnefndarinnar, og skal í því tilliti tekið fram, að hina stærri styrksupphæð skal að jafnaði eingöngu veita börnum, sem bæði eru föður- og móðurlaus, eða föðurlausum börnum, er móðir þeirra fyrir heilsubrest eða elli eigi getur unnið fyrir sjer eða hefir fyrir mörgum börnum á ómaga aldri að sjá.

Ekkert er því til fyrirstöðu, að móðir og börn hennar, sem yngri eru en 15 ára, njóti samtímis styrksins. Og þótt barni, sem er fullra 15 ára, eigi verði veitt nein styrksupphæð, eru engin takmörk sett fyrir því í hve mörg ár samfleytt veita megi ekkju styrk af sjóðnum, ef stjórnarnefndin álitur hana þess maklega.

5. gr.

Umsóknir um styrk úr sjóðnum skulu vera undirskrifadar af hlutaðeigandi ekkju eða fjárhaldsmanni hlutaðeigandi barns og, ef unnt er, skal hlutaðeigandi sóknarprestur votta á þær, að upplýsingar þær, er í þeim standa, sjeu sannleikanum samkvæmar. Þannig úr gærði gjörðar skulu þær lagðar fyrir hlutaðeigandi sýslunefnd, og skal sýslumaður síðar senda þær stjórnarnefndinni ásamt umsókn sýslunefndar.

Sá sem fengið hefur styrk úr sjóðnum, verður á ári hverju, að endurnýja umsókn sína, ef hann vill, að styrkurinn verði veittur honum áfram, en gamlar umsóknir verða eigi teknar til greina við úthlutun styrksins, nema þær sjeu endurnýjaðar.

6. gr.

Prentuð eyðublöð undir umsóknir um styrkinn skulu ávallt vera til hjá hverjum sýslumanni, og sömuleiðis skal eitt eintak af skipulagsskrá þessari jafnan vera til sýnis hjá sýslumönnum. Kostnaðurinn við að gefa út og senda sýslumönnum umsóknareyðubiöðin og skipulagsskráreintökin greiðist af sjóðnum.

7. gr.

Vaxtaupphæð sú sem samkvæmt árlegum reikningsskilum kynni að hafa sparast á reikningsárinu, skal jafnan leggjast við höfuðstól sjóðsins og ávaxtast með honum.

8. gr.

Fyrir sjóðinn skal haldin bók; í hana skal rita skipulagsskrá þessa og væntanlega staðfestingu hennar, skrá yfir styrknjótenur og skýrslu um umræður þær er framfara sjóðnum viðvíkjandi.

9. gr.

Reikningsár sjóðsins telst frá 1. september til 31. ágúst; reikning sjóðsins skal semja fyrir hvert reikningsár, og skal senda hann undirritaðan af stjórnarnefndinni til landshöfðingja í síðasta lagi 2 mánuðum eptir lok reikningsársins. Landshöfðingi skal því næst fyrir lok almanaksársins birta reikning sjóðsins með samþykktaráritun í B-deild Stjórnartíðindanna.

Reykjavík 27. marz 1903.

Landshöfðinginn yfir Íslandi

Magnús Stephensen.

Jón Magnússon.